

TAYTUS Pol Taytus Nop Mij Tikak

¹ Yad Pol, bi God nop wog giñeb ne, bi Jisas Klays takaw nop dad ameb ak midebin. Binib God ne kilop dinig aglak okok, kilop agtep gen, kili kiles gil nop gos liniginigel. Linijid, takaw niñid yibil ak nigilig, God anigup tek ak niñid kidek ginigel.

² Pen takaw niñid yibil ne ak nigilig, pel pelnep yonigabun agil nop kod midebal. God bi takaw niñid yibil nep agup ak, bilel man ma alwol gilak ñin ak, binib kilop gen pel pelnep yenigabal aglak. Aglek nim, ne yepis ma agup tek,

³ ñin ne ke aglup ak apek, bi oginap takaw ne agñel, takaw anib ak misenj lak. Pen God bi kasin gep chin ak, yip dil kiles gil agek, takaw ne ak dad amil agñibin.

⁴ Taytus, nad yad ayip, chilapil Klays nop gos linopul ak tek, nad ñi yad mideban. Pen mij anib ak ñu kil tikil nep ñebin. Bapi God chin ayip, Klays Jisas bi kasin gep chin ak ayip, nep yimug niñid gitep gel midtep ginimin.

*Bi Klays binib ne okok kilop kod midebal okok
kilop aglinimin*

⁵ Yad anigil gos nepin, wog oginap ma gilok ak, nad ditep ginimin. Ditep gil, bi Klays binib ne okok kilop kod midep oginap, taun keke midebal tek

aglinimin, yad nep aginek tek. Anigil gos niñid, man ñig tib kus gak Klit ak nep keligil amnинек.

6 Pen bi Klays binib ne okok kilop kod midep olap, ne anigil yonimuñ. Bi tep yibil midek, binib oginap nop nigel tep ginimuñ. Bin nokom dinimuñ. Ñipay ne Klays nop gos linigel, binib oginap bi ak ñipay ne ak sawl sek lek monmon gebal agil ma aginigel tek lup.

7 Bi Klays binib ne okok kilop kod midep ak, God wog ne kod midtep ginimuñ. Bi tep yibil midek, binib oginap nop nigel tep ginimuñ. Ne yad yib awl yibil dil, binib okok kilop kodin agil gos ma niginimuñ. Bi oginap kilop takaw timel oginap kasek ma aginimuñ. Ñig kiles ñibil sawl ma lil, kabiyam timel ma junimuñ. Mani tap okok yad nokom din agil gos ak ma niginimuñ.

8 Pen binib kilop ag dap kal migan ne linimuñ. Ne wog teplep gek nop tep ginimuñ. Bi takaw sayn tep agil, gos nigtep ginimuñ. Bi teplep midtep gil midil, bi suntep God agup tek nep gil, gos timud nab ne ayan ke kod midtep ginimuñ.

9 Takaw yipid gil pel agñibun ak di midonimuñ. Kiles gil di midil nim, binib okok kilop takaw yipid gup ak nep agñi tep gil, kilop kiles ñinimuñ tek lup. Pen binib takaw yipid gil ak tibilikipal okok, kilop timud wukilig kiles gil agñi tep gonimuñ, takaw pen aginigel tek olap ma yenigab.

*Man Klit ak, bi kuñay takaw timel agel, oginap
Klays nop gos nepal ak keligipal*

10 Pen Klays binib ne pelpel apnan gipal man ñig tib kus gak Klit okok, kili kunjay takaw tep yibil ak tibilikil, God nop kidek ma gipal. Takaw yokip kunjay agilig, binib okok kilop nebneb gilig yepis apal. Bi anib okok oginap bi Juda kay, wak tibilikinigun agil kiles timel gil apal. Anib ak tek, nad bi Klays binib ne okok kilop kod midebal okok, kilop aglinimin.

11 Bi takaw tep yibil ak tibilikipal okok, mani tap okok dun agil, binib yokip okok kilop anigil anigil ginimib agil, takaw apal ak yepis apal. Agel, apiligon amiligon ñapay kili oginap Klays nop gos nepal ak keligil apyap pakipal. Anib ak kilop agenimib, takaw agebal anib ak keliginigel.

12 Bi gos nigep kili ak, man Klit nib olap, ne bielel anib agak, Binib man Klit nib okok, pelpel yepis yibil nep agil, kilop yilik gek wog ma gil tap ak nep ñijun agil gos nepal agak. Gos anib ak niñid, tap ladek binib su ñijeb tek ak midebal agak.

13-14 Takaw gos nigep agak anib ak, niñid yibil agak. Anib ak kili anigipal okok, nad kilop timud wukil kiles gil aginimin. Agenimin, bi Juda kesim yokip apal okok sek, takaw niñid yibil ak keligil takaw kiles adek apal okok sek, ma niñid dinigel. Pen takaw yipid gil ak dilig, Klays nop gos liniginigel.

15 Binib kili God wiñin adek siñak gach sek ma yenigel okok, tap okok midupsek dinigel ak tap gach sek ma dinigel. Pen binib God wiñin adek

sinjak gach sek midil, Klays nop gos ma niginigel okok, tap okok midupsek dinigel ak tap asinj. Takaw kili nepal ayip, gos kili ayip gach sek mideb. Binib anib okok tek, gos timud kili pisnep timel gek, nigtep ma gipal.

16 God binib ne midobun apal ak pen, gipal tek nigon, kili God yil ma midebal. God kilop nigeck tep ma yibil gup. Takaw ne tibilikil, tap teplep olap ma ginigel tek lüp.

2

Taytus ne bi milep bin milep okok kilop takaw agñinimunj

1 Pen nad, binib okok kilop God takaw yipid gil adek ak nep agñinimin.

2 Bi milep okok kilop age, takaw sayn tep agil, gos nigtep ginigel. Gitep gel binib nigel tep ginimuñ. Titay gonimuñ, kili Klays nop nokom gos linijid, binib okok kilop mapen lil, kiles timel gil minjel okok dil, anib okok ditep ginigel.

3 Bin milep okok kilop abe agñe, God gos ne nigup pal ak ajenigel. Binib oginap kilop ma agjuwil, ñig wayn kunjay ñijun agil gos ak ma niginigel. Gitep gil midtep ginigun agil gos nigtep gil, agñi tep ginigel.

4 Anigil nim, bin tob agen kidek lipal okok kilop agñi tep gel, nigimil sek ñapay sek kilop mapen yibil linigel.

5 Bin takaw sayn tep agil, gos nigtep ginigel. God widden adek siňak gach sek ma yenigel. Wog kal kili ke ak gil, binib okok ditep gil, nigimil sikop muk okok midil ginigel. Tap anib okok anigenigabal, binib oginap niňid, God takaw ne ak ma agjunigabal.

Taytus ne bi pilaj okok kilop takaw agñinimuj

6 Pen nad bi pilaj okok kilop abe agñi tep ge, bi takaw sayn tep agil, gos nigtep ginigel.

7 Tap okok midupsek ginigaban ak, gitep nep genimin, kili nep niňid gitep gipan tek ginigel. Pen binib okok kilop God takaw ak agñenigaban, yepis agilig yimel yimel agilig ma aginimin. Takaw niňid yibil ak nigtep gil,

8 yipid gil agñi tep ginimin. Yipid gil nep agenimin, takaw olap ma mideb, binib chinop milik nepal okok, takaw oginap piyow mel niňid, nebej dinigel.

Bi wog giňeb okok, biawl kili ak takaw kilop aginigel niňid kidek ginigel

9 Pen binib wog giňeb okok kilop age, tap okok midupsek ginigabal ak, biawl kili muk okok yenigel. Biawl kili okok aginigel tek nep gel, kilop tep yibil ginigabal. Biawl takaw kilop pen ma agil,

10 tap kilop si ma dinigel. Anigil anigil gitep ginigel ak nim, biawl kili okok, kili bi wog giňeb chin okok gitep yibil gil apun tek nep gipal agil niginigabal. Anib ak niňid, kili God bi kasin gep

chin ak takaw tep ne agñibun ak niñid, takaw teplep yibil ak niñid yibil mideb aginigabal.

Chin God gup ak kidek gil, Klays ne ownigab ñin ak kod yonigabun

11 Chin nopen, God binib okok kilop yimug niñid gitep gep ak misenj lup. Pen yimug niñid gitep gep anib ak kilop gek, midupsek tig asik dinimuñ tek lup.

12 Chin God nopen kud ñil, ne anigup tek kidek ma gep ak sek, tap lum awl dun agil gos nigep ak sek, pisnep keliginigun. Chin pen takaw sayn tep agil, gos nigtep gil ginigun. Teplep midil midtep gil, God anigup tek gun agil gos niñid ginigun. Binib lum awl nab okok midobun ak pen, God yimug niñid gitep gep ne ak niñid, chinop takaw tep anib ak agñek, gos ne ak kidek ginigabun.

13 Pen kidek gil, mid dad amil, tap teplep niñid miñmiñ ginigabun ak, chin kod midobun. Tap teplep anib ak nim awl, Jisas Klays ne milek awl sek kiles awl sek dil, misenj sinjak ownigab. Ne God biawl yibil mideb, bi kasin gep chin ak mideb.

14 Ne binib dil God ayip jimñil lin agil kumak. Chinop nen agil kumek nim, God takaw tibilikipun ak keligil, binib ne ke yibil okok midobun. Tap timel anib okok midupsek wik yokilig yek, binib ne ke yibil midobun ak, chin tap teplep yibil ginigun agil gos niñid ginigabun.

2:11 Jon 1.9, Lom 5.15, 1 Pi 5.12 **2:12** Lom 6.19, Epe 1.4, Kol 1.22, 1 Te 4.7, 1 Jo 2.16 **2:13** 1 Ko 1.7, Plp 3.20, Kol 3.4, Hib 9.28, 1 Jo 3.2 **2:14** Kis 19.5, Lo 4.20, 7.6, 14.2, Sng 130.8, Ese 37.23, Gal 1.4, 1 Pi 2.9

15 Takaw agesipin anib awl, binib okok kilop agñil, pel agñi tep ginimin. Pen binib takaw tibilikipal okok kilop, timud wukinimin. God ne nep dil agek, takaw kiles gil agenimin, jonib kid nep ak sipsip ma niginigel.

3

Chin tap teplep ak gittep ginigun

1 Binib okok kilop age, takaw anib ak gos niginigel. Gapman biawl okok sek, biawl kili okok sek kilop muk okok midil, takaw aginigel ak niñid kidek ginigel. Pen minek minek wog teplep ak gittep ginig yenigel.

2 Bi olap nop ma agjuwil, penpen ma aginigel. Bi oginap kilop kimigel jimñil midil, midupsek ayip kimigel midon agil, gittep yiþil ginigel.

3 Nibi nepim, chin abe ned binib sawl midil, takaw tep tibilikil, chinop tay yepis ageligiþal takaw niñid gittep ma goligipun. Tap lum awl dun agil gos niñid miñmiñ goligipun ak, tap anib okok wog giñeb kili tek yoligipun. Tap si tap timel ginigun agil gos niñid, tap kili okok yad tek midobikop agil goligipun. Binib okok chinop milik niñid, penpen yilik nigoligipun.

4 Anigoligipun ak pen, God ne bi kasin gep chin ak, chinop mapen yiþil lil, yimug nigup. Anib ñin ak, tap teplep anib okok misen lek,

5 God chinop tig asik dup. Chin gitep yibil gon niñid, chinop tig asik ma dup. Ne ke pen chinop mapen nigup tek tig asik dup. Won anib ak kilop tig asik din agil, gach chinop ak wik yokil, Kawnan ne ak chinop agyokek apil chinop gek, ñapay ne yibil midil, korjim nep midobun.

6 Pen Klays Jisas, bi kasin gep chin ak, wog ne gek, God ne Kawnan ne ak chinop monmon tig sogak.

7 Monmon tig sogek, pel pelnep yonigun agil nopun tek nep, God aglil agak tek kod midobun. Klays chinop yimug niñid gitep gek, God nigeck binib suntep ne okok midobun anib ak tek, pel pelnep yonigabun ak kod midobun.

8 Takaw anib ak niñid yibil yek.

Pen binib God nop gos linepal okok, kili pelnep kiles gil gitep ginigel. Anib ak, takaw anib awl kiles gil aginimin agil gos nepin. Tap anib okok teplep yibil, binib anib okok kilop gek midtep ginigabal.

9 Nad pen, takaw nigeck ma nigeck ag amil apil gipal ak, apis based chin takaw agebal ak, takaw penpen ag amil apil gipal ak, takaw Mosis ñu kil tikak ak niñid ag gil penpen yibil apal ak, takaw anib okok midupsek kud ñinimin. Jij olap ma mideb, binib okok kilop gek midtep ginigel tek ma lup.

10 Anib ak bi olap, Klays binib okok kilop tig asik keke lenigab, ñin olap agil, nop gos timud

3:5 Jon 3.3-5, Lom 11.6, Epe 5.26, 2 Ti 1.9, 1 Pi 3.21 **3:6** Jol 2.28, Apo 2.17-18, 2.33, Lom 5.5 **3:7** Lom 3.24, 8.23-24, Gal 2.16, Tat 2.11 **3:8** 1 Ti 1.14-15, Tat 2.14 **3:9** 1 Ti 1.4, 2 Ti 2.14-16, 2.23, Tat 1.14 **3:10** Mat 18.15-17, 2 Ko 13.2, 2 Te 3.6, 3.14, 2 Ti 3.5, 2 Jo 10

wukinimin. Pen ma nigeck, minek ak abe aginimin. Minek ak abe ma nigeck, nop kud ñinimin.

11 Nad nepan, bi anib ak tek, bi gos timel ninjd, tap nigepp ma nigepp gup. Pel tap si tap timel gup ak nim, tap timel anib okok, nop ke pen adikid amub.

Takaw day won oginap

12 Yad Atemas nop akañ, Tikikus nop agyoken, nep am niginigab. Nigeck won anib ak, kasek apil taun Nikopolis yip niginimin. Yobup lil takil ginigab ñin ak, yad am man anib ak yenigayn agil gos nepin.

13 Bi Senas, takaw tig asikep olap ayip, bi Apolos ayip, kilop ditep ginimin. Kanib amnig gel, tap anib okok midupsek nittep ge dad amnimil. Nad anige, tap olap kilop bi ominal kul ma gup.

14 Binib chin okok monmon midil, yokip ma yenigel. Wog tep ginigun agil gos ninjd, gitep gilig tap midaknij, binib tap ma mideb okok kilop oginap ñinigel.

15 Binib midupsek yad ayip midobun okok, nep ag dideg lebal. Pen nad takaw chin ak dil, binib Klays nop gos linijid chinop mapen lipal okok, kilop ag dideg linimin.

God nibop midupsek yimug ninjd gitep ginimuñ.

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 28 Dec 2024 from source files dated 29 Jan 2022

24d09cce-9a93-523a-afa5-7b091c264cee